

四庫全書薈要

• 乾隆御覽本

集部

石湖詩集卷十四

宋 范成大 撰

晚春二首

以下桂林作  
舊在乙稿

靜極聞檐珮  
慵來愛枕幃  
隙虹飛永晝  
簾影碎斜暉  
燕踏花枝語  
蜂縈柳絮歸  
輕颺宜白紵  
時節近清微  
好事憐春老  
無愁耐日長  
爐煙驚扇影  
酒面舞花光  
照水雲容嬾  
移牀竹意涼  
更煩紅槿帽  
促拍打山香

紅豈蔻花

綠葉蕉心展紅苞竹籜披貫珠垂寶珞剪綵倒鸞枝且  
入花欄品休論藥裏宜南方草木狀為爾首題詩

偶題

檐雨初乾團扇風夕陽芳樹綠葱葱蕉心榴萼俱無賴  
要與春衫相並紅

次韻郭季勇機宜雪觀席上留別

勝絕尊前萬事休縱非吾土且登樓山迎雨脚俄飛過

風約江聲欲倒流野水漸堪添酒面夕陽依舊滿簾鉤  
憑闌從此遲歸鞅能及中秋對月不

次韻許季韶通判雪觀席上

把酒臨風瑞露傾瓊漿何用謁雲英捲簾雨脚銀絲挂  
倚杖江頭綠漲生嶺海一涼蘇暑病山林千籟試秋聲  
茲遊奇絕忘羈宦慚愧煙中短棹橫

送周直夫教授歸永嘉

青燈相對話儒酸老去羈遊自鮮歡昨夜榕溪三寸雨

今朝桂嶺十分寒  
知心海內向來少  
解手天涯良獨難  
一笑不須論聚散  
少馬吾亦跨歸鞍

贈趙廉州

馬羣雜沓草蒙茸  
刮目權奇一洗空  
天末也煩行李到  
歲寒聊得酒尊同  
梅花夜夜湘南雨  
榕葉年年海北風  
少待佳晴看山去  
玉簪高插翠雲叢

去年過弋陽訪趙  
恂道通判話西湖  
舊遊因題小詩近  
忽刻石寄來謾錄

紅塵寶馬碧湖船一夢如今費十年却照清溪尋綠鬢  
但餘衰雪兩蕭然

送唐彥博宰安豐兼寄呈淮西帥趙渭師郎中

唐子皦目鮮水清石粼粼繡腸五車書不鄙簿領塵黔  
山與桂嶺一笑二十春天涯會面難歲晚情話真五管  
無賢侯但有嵐煙昏此豈功名場往戍清淮濱北門詩  
書帥平生吾故人問訊今何如凌煙上星辰為言落南  
客病作寒螿呻飄飄北歸夢夜繞吳淞雲

燕堂後盧橘一株冬前先開極香

盧橘花殘細細飛滿枝晴日鬧蜂兒霜餘有此香無奈  
合與稱題賦小詩

乾道癸巳臘後二日桂林大雪尺餘郡人云前此  
未省見也郭季勇機宜賦古風為賀次其韻

憶昔北征秋遇雪穹廬苦寒不堪說飛花如席暗燕然  
把酒悲歌度佳節燕山館客類西河鐻戶不容浮蟻泄  
當時已分餐羶芋寧復夢遊炎嶺熱忽逐梅花行萬里

又與故山輕話別天公恐我愁瘴霧十日號風吹石裂  
同雲乃肯度嚴關一夜玉峰高巖嶮老榕菴密最先縞  
穉竹枵虛時一折須知桂海接蓬瀛滿目三山白銀闕  
不管樓高翠袖單但嫌酒淺金杯凸東郭先生履雖敝  
詩情却鬪冰壺潔歸撚凍髭搜好句山館青燈對明滅  
為憐叶氣到黃茅何止森森松柏悅豐年作守會飽煖  
羈宦思歸自愁絕豈無菊徑樂琴書亦有秫田供麴蘖  
東岡雪後一犁春誰在陂頭憶調燮



次韻陳仲思經屬西峰觀雪

仙人灕江遊剪水馮夷宮賓友來鄒枚寒轡搖冬瓏起  
望天南陸玉沙滿長風越人未省識把酒酹層空從來  
嶠南北人謂將無同那知梁園霰飛入瑞露中幕府有  
清士尋僧上西峰六花信娟巧未及五字工我亦滌冰  
硯課虛貴新功莫嗤兩臞儒毫端尚清豐

喜雪示桂人

臘雪同雲嶺外稀南人北客盡冬衣從今老杜詩猶信

梅片飛時雪也飛

寄題商華叔心遠堂用卷中韻

示我新詩卷知君遜俗情  
安流視巫峽灰劫笑昆明  
徽外夜絃語甕頭春蟻生  
藍橋即仙窟何況有雲英

送郭季勇同年歸衡山

天壤郭有道文獻今在茲  
啄啄家雞羣見子野鶴姿  
塵籠萬里心擇食中夜飢  
拙宦避捷徑瘴風吹鬢絲  
平生杏園友把酒天南陲  
何敢吏朱浮但喜見紫芝  
問君今

何適舊圃餘荒畦提攜漢陰甕歲晚俱忘機勿開衡山  
雲恐驚隱淪棲定肯從君遊歲晚攀桂枝我亦理吳榜  
春湘綠蘋齊風蒲為誰落之子同襟期丁寧祝融峰將  
迎兩枯藜一望五千里共洗蠻煙悲

甲午歲朝寓桂林記去年是日泊桐江謁嚴子陵  
祠迤邐度嶺感懷賦詩

去年曉纜解江臯也把屠蘇泛濁醪一席飽風漁浦闊  
千山封雪釣臺高將軍老矣鳴孤劒客子歸哉咏大刀

早晚扁舟尋舊路  
柁樓吹笛破雲濤

癸水亭落成示坐客長老之記曰  
癸水繞東城永  
不見刀兵余作亭於水上其詳具記中

天將福地鞏嚴城  
形勝山川表裏明  
舊說桂林無瘴氣  
今知灘水辟刀兵  
雲深銅柱邊聲樂  
月冷珠池海面平  
願挽江流接河漢  
為君直北洗欃槍

緩帶軒獨坐

午日烘開苴蔻苞  
檐塵飛動雀爭巢  
蒙蒙困眼無安處

閒送爐煙到竹梢

食罷書字

甲子霖涔雨東南濕蟄風荔枝梅子綠豈寇杏花紅捫  
腹蠻茶快扶頭老酒中荒隅經歲客土俗漸相通

蠻茶出修

仁大治頭風老酒  
數年酒南人珍之

次韻平江韓子師侍郎見寄三首

自古四愁湘水深誰將城郭啓山林有情碧嶂團欒繞  
無數朱樓縹緲臨蚪鼓揭天驚客坐象登航海厭蠻琛

三千客路長安遠故舊書來直萬金

南人以蚌蛇皮作腰鼓響徹異常交

趾以象革為兜鍪皆異事

靈泉杖屨浙江頭經濟長懷尚典州堂上讀書朝氣爽

臺前呼月海光浮交情尺素勤雙鯉筆力枯松挽萬牛

已把三章翻樂府為君擊節變蠻謳

子師新作小築於浙江疏靈泉讀書

堂呼月臺皆其處也

前年衝雪過雙溪風帽泥韉騎吹隨爛醉依前逢錦瑟  
好音惟是欠黃鸝功名未試玉璫玦離別頻傾金屈卮

疇昔北征煩吉夢南征合有夢歸時

頃年北使時朝野多妄傳被留不歸

子師家中人忽夢予歸翌日過界報到故末句及之鶯鶯子師家善歌者前年過發春滿已去

宜齋雨中

秀麥一番冷送梅三日霖綠肥新荔子紅浥舊蕉心映  
竹千絲舞垂檐一線斟終朝盤膝坐卑濕恐相侵

次韻許季韶通判水鄉席上

青山綠浦竹間明彷彿苕溪好處行解慍風來如故舊  
催詩雨作要將迎休兵幕府烏鳶樂熟稻邊城鼓笛聲

摹寫箇中須綵筆句成仍挾水雲清

水鄉酌別但能之主管能之將過石康

南郭河橋市井喧綠荷香處有江天一簾梅雨爐煙外  
三疊陽關燭淚前馬耳西風君並海船頭北渚我歸田  
後期只恐參商似且醉金槽四十絃

六月十五日夜汎西湖風月溫麗

暮樣金龜潭追隨今夕涼波紋挾月影搖蕩舞船窓夜  
久四山高松桂黯以蒼長煙界巖腹浮空餘劒鉞棹夫



三弄笛跳魚翻素光我亦醉夢驚解纓濯滄浪多情笑  
蕩風嫋嫋吹鬢霜會心有奇賞天涯此何方清潤不立  
塵空明滿生香過清難久留俛俯墮渺茫

燕堂書事

歲稔齋鈴閒年深屋墜推猩爭雷瓦過螳化雨窓來盡  
日風常籟無時地不梅耳邊情話少笑口若為開

酒邊二絕

團扇香中嫋嫋風斷腸聲裏看羞紅不須過處催乾盞

聽徹歌頭盞自空

日長繡倦酒紅潮  
閒束羅巾理六么  
新樣築毬花十八  
丁寧小玉慢吹簫

枕上作

繞枕蚊相聒  
翻釭鼠自忙  
早衰秋夢亂  
不寢曉更長  
賦擬騷人屈  
吟成病客莊  
安心無可覓  
隨處且為鄉

思歸再用枕上韻

老覺觸事懶  
病添歸計忙  
行年心已化  
疇昔意空長  
五

柳栗里宅百花錦城莊何時去檢校一棹水雲鄉

李正之提點行至郴用予忙字韻寄和答

天涯逢我病秋晚送君忙感緊交情厚留連別恨長賓  
筵猶雪觀客路已雲莊搖落郴江路應須憶醉鄉

曉出北郊

偏仄深巷中蔥蘢綠陰交山家不早起閉戶如藏逃濃  
露蛻蟬咽小風飢燕高新渠厓涓流壞陂方怒號遐眴  
病瘠土不肯昏作勞滅裂復滅裂晚秧如牛毛空餘朝

氣白浮浮濕弓刀官稱勸農使臨風首頻搔

甘雨應祈三絕

晚稻成苞未肯肥鵲鳩啼曉雨來時黃紬被冷初眠覺  
先向芭蕉葉上知

數日雖蒙霖霖霑塵終恨太廉纖今朝健起巡檐看  
恰似廬山看水簾

高田一雨免飛埃上水網船亦可催說與東江津吏道  
打量今晚漲痕來

與鄭少融趙養民二使者訪古訾家洲歸憇松關  
二君欲助力興廢戲書此付長老善良以當疏頭  
飄飄竹雨潤輕裘  
嫋嫋松風繫小舟  
安得從容興廢手  
越人重上訾家洲

淳熙甲午桂林鹿鳴燕輒賦小詩少見勸駕之意  
維南吾國最多儒  
聳看招招赴隴書  
竹實秋風辭穴鳳  
桃花春浪脫淵魚  
月宮移種新栽桂  
江水朝宗舊鑿渠  
況有狀頭坊并在  
明年應表第三閭

郡人曹鄴及第詩  
云我到月宮收得

種為君移向故園栽今歲用故事植桂正夏進德二堂之下又復朝宗古渠以應文章應舉之識趙觀文王世則亦郡人皆魁天下故詩中悉及之

逍遙樓席上贈張邦達教授張癸未省闈門生也  
同年進士俱會樓上者七人

疇昔金門看選賢一星終矣半英躔誰憐蠻府清池句  
不著南山捷徑鞭作者七人茅瘴地肅霜九月菊殘天  
浮生聚散如風雨同倚東樓豈偶然

畫工李友直為余作冰天桂海二圖冰天畫使北

朝渡黃河時桂海畫游佛子巖道中也戲題

許國無功浪著鞭天教飽識漢山川  
酒邊蠻舞花低帽夢裏胡笳雪沒韉  
收拾桑榆身老矣追隨萍梗意茫然  
明朝重上歸田奏更放岷江萬里船

耳鳴戲題

歷歷從何起泠泠與耳謀人言衰相現  
我以妄心求遠磬山房夜寒蛩隴樹  
秋圓通無別法但自此根修

復作耳鳴二首

至音豈寂透希夷珍重幽田為發揮妙用何關新卷葉  
圓通自有倒聞機夢中鼓響生千偈覺後春聲失百非  
寄語爵陰吞賊道玉牀安穩坐朱衣

東極空歌下始青西方寶網奏韶英不須路入兜元國  
自有音聞寶筏城牛蟻誰知牀下鬪雞蠅任向夢中鳴  
如今却笑難陀種無耳何勞強聽聲

碧虛席上得趙養民運使寄詩約今晚可歸次韻  
送之



偶攜尊酒上孱顏  
忽憶行人瘴霧間  
便好來分蒼石坐  
已教不鎖翠雲關

寒夜

萬象間無語一蛩吟  
獨譁肅肅月浸樹  
滿庭穠李花風從  
月中來吹我兩鬢  
華北斗聲迴環南  
斗亦橫斜人生幾  
良夜吾行久天涯  
離居隔江漢何由  
寄疏麻

甲午除夜猶在桂林  
念致一弟使金今夕  
當宿燕  
山會同館兄弟南北  
萬里感悵成詩

把酒新年一笑非鵲鴿原上巧相違墨濃雲瘴我猶住  
席大雪花君未歸萬里關山燈自照五更風雨夢如飛  
別離南北人誰免似此別離人亦稀

乙未元日用前韻書懷今年五十矣

浮生四十九俱非樓上行藏與願違縱有百年今過半  
別無三策但當歸定中久已安心竟飽外何須食肉飛  
若使一丘并一壑還鄉曲調儘依稀

儘乃俗字

再用前韻

時被命帥蜀

休論今昨總皆非世味誠甘與我違蜀道雖如履平地  
杜鵑終勸不如歸三冬自苦坐毛穎一夢微官陪蟹飛  
夜久南枝翻倦鵲茫茫月白衆星稀

與同僚遊栖霞洞極深遠中有數路相傳有通九  
疑者燭將盡乃還飲碧虛上陳仲思用二華君韻  
賦詩即席和之

竹杖芒屨俗網疎每逢絕勝更踟躕但隨岐路東西去  
莫計光陰大小餘彷彿桃源猶舞鳳辛勤李白謾騎魚

今朝真作遊仙夢不似騷人賦子虛

施元光在崑山病中遠寄長句次韻答之

四海飄蓬客舍邊幾多雲水與風煙絕無膂力驅長轡  
空有孤忠誓大川參井忽隨征馬上斗牛應挂故山前  
親交情話知何許詩到天涯喜欲顛

次韻趙養民碧虛坐上

已將山色染眉黛更挽江波添酒罍珍重江山勸人醉  
笑人驅馬惺惺迴

贛州明府楊同年挽歌詞二首

拱壁溫無類深蘭遠自芳清班孤玉筍薄宦老銅章傳  
業麒麟子承家鴻鴈行門闌自簪笏吾獨憾堂堂

憶昔龍門化曾容鴈塔陪逡巡九閭過迢遞一書來未  
報錯刀贈驚傳丹旆迴辰陽隔江渚空夢楚詞哀

石湖詩集卷十四

石湖詩集卷十五

宋 范成大 撰

初發桂林有出嶺之喜但病餘便覺登頓至靈川  
疲甚自歎羸軀乃無一可偶陸融州有使來書此  
寄之

桂林獨宜人無瘴古所傳北客守炎官恃此以泰然堂  
高愜宴坐訟簡容佳眠不計身落南瘡柄三回天今朝

遂出嶺歡呼繫行纏  
置兔脫豐草池魚躍  
清淵那知多病身久  
靜翻懷安長風蕩籃  
輿簾箔飄以翔靈泉  
路喫蹶僕夫告頽肩  
我亦頭岑岑中若磨  
蟻旋走投破驛宿強  
飯不下咽茲事未渠  
央萬里蜀道難十年  
故倦遊況乃成華巔  
懣老當作繭不繭夫  
何言

甘棠驛

萬里三年醉嶺梅  
東風刮地馬頭迴  
心勞政拙無遺愛  
慚向甘棠驛裏來

靈泉

驛後有龍惠泉

泉螭無語笑經過欲拊羣鰓奈拙何孤奉明恩雖出嶺  
歡顏終少汗顏多

嚴關

或謂之炎關桂人守險處朔雪多不入關關內外風氣迴殊人以為南北之限也

回看瘴嶺已無憂尚有嚴關限北州裹飯長歌關外去  
車如飛電馬如流

施進之追路出嚴關且寫予真戲題其上

喚渡牂牁瘴水濱嚴關關外又逢春神仙富貴俱何在



且作全家出嶺人

興安乳洞有上中下三巖妙絕南州率同僚餞別者二十一人遊之

山水敦夙好烟霞適奇懷向聞乳洞勝出嶺更徘徊雪  
林縞萬李東風知我來華裾繡高原故人紛後陪繫馬  
玉溪橋嵌根豁崔嵬蕩蕩碧瑤宮冰泉漱牆隈芝田溉  
石液深畦龍所開勾我一掬慳類此炎州埃仍呼輪袍  
舞醉倒瑞露杯但恐驚山靈腰鼓轟春雷薪翁雜餉婦

園視歡以咍茲巖何時鑿閱世幾劫灰始有此狂客後  
會真悠哉南遊冠平生已去首猶回歲月可無紀三洞  
俱磨崖會有好事者摩娑讀蒼苔

鐮背

在興安縣五里所秦史祿所作也迎海陽水壘石為壇前銳如鐮衝水分南北下為湘灘

二江功用奇偉余交代李德遠嘗修之

導江自海陽至縣迺瀾迤狂瀾既奔傾中流遇鐮背分  
為兩道開南灘北湘水至今舟楫利楚粵徑萬里人謀  
敘天造史祿所經始無謂秦無人虎鼠用否耳紫藤纏

老蒼白石溜清泚是聞可作社牲酒百世祀修廢者誰  
歟配以臨川李

大通界首驛

愚悃無華敢自欺寸誠珍重吏民知東風重倚庭前樹  
送別人情似到時

陳仲思陳席珍李靜翁周直夫鄭夢授追路過大  
通相送至羅江分袂留詩為別

相送不忍別更行一程路情知不可留猶勝輕別去二

陳拱連壁僊李瑚璉具周子雋拔俗鄭子秀風度嗟我  
與五君曩如栖鳥集偶投一枝宿飄搖共風雨明發各  
飛散後會渺何處栖鳥固無情我輩豈漫與班荆一炊  
頃聽此昆弟語把酒不能觴有淚若兒女脩程各著鞭  
慷慨中夜舞功名在公等臞儒老農圃

懷桂林所思亭

蓼山奇絕送歸時曾榜新亭號所思桂水祇今湘水外  
他年空有四愁詩

羅江

嶺北初程分外貪驚心猶自怯晴嵐如何花木湘江上  
也有黃茅似嶺南

初入湖湘懷南州諸官

今晨入湖南甘土絳以紫厥壤既殊異風氣當稱此回  
思始安城舊籍贅楚尾實惟荊州隸零陵之南鄙時雪  
度嚴關物色號清美儻以土宜觀尚非清湘比何況引  
而南焦茅數千里向我作牧時客過不停軌憧憧走官

下既至輒咎悔書來無別語但說瘴鄉鬼我今幸北轅  
又念衆君子懷哉千金軀博此五斗米作詩諷方來南  
遊可以已車輪倘無角吾詩亦金柅

清湘縣郊外雜花盛開有懷石湖

午行清湘縣妍煖春事嘉柴荆鬧桃李冥冥一川花故  
園豈少此愈此百倍加我寧不念歸顧作失木鴉百年  
北窓涼安用天一涯君恩重喬嶽敢計征路賒鄉心與  
官身鑿枘方聳牙橘柚走珍貢何如繫匏瓜明當復露

奏天日臨幽遐儻許清江使曳尾還汙邪

珠塘

未至清湘  
二十里

林茂鳥鳥急坡長驢馱鳴坐輿猶足痺負笈想肩頽廢  
廟藤遮合危橋竹織成路傍行役苦隨處有柴荆

題湘山大施堂

山中祖師號無量  
壽真身塔在焉

重倚春林淚竹枝南遊風物鬢成絲難尋桂海千峰夢  
更了湘山一段奇來去別無心外法行藏休問塔中師  
若論大施門前事竿木逢場且賦詩

清湘驛送祝賀州南歸

海內交情兩斷金，離歌倡和俱吳音。  
桃花如雨暮春酒，竹箭有筠他日心。  
萬里書來蜀道易，四愁詩成湘水深。  
田園將蕪各早計，一棹五湖能見尋。

清湘驛送王柳州南歸二絕

南歸北去路茫茫，不是行人也斷腸。  
可惜湘江春夜月，落花時節照離觴。

我已蕪程無脚力，君猶追路有襟期。  
從今月下共花下。



誰復醉吟先和詩

七里店口占

分手暮江寒徘徊立馬看尋常相見易倍覺別離難  
全守支耀卿飲餞七里倅楊仲宣復攜具至深溪  
酌別且乞余書走筆作此蕪寄耀卿

店舍烟火寒塵沙亭堠遠嫣紅糝芸綠春事亦已晚年  
芳去跋跋江水來衮衮故人瀟湘逢留落一笑莞已張  
七里飲更出深溪餞草間艷紅粉竹裏趣厨傳故意如

許長由來共鄉縣愧我不能觴負此離歌轉別愁滿天  
末不醉何由遣却憶支使君風前白波捲

深溪鋪中二絕追路寄呈元將仲顯二使君

賀州歸去柳州還分路千山與萬山把酒故人都別盡  
今朝真箇出陽關

祇有南風捲路塵斷無南客送車輪故人合在瀟湘見  
却向瀟湘別故人

戲題愚溪

碧湍漱白石沄沄復湯湯既為人所愚安用爾許忙我  
昔曾經過重來已三霜無事趼雙足奔走寧非狂溪流  
到江平翻笑容路長豈不有歲晚乞身還故鄉

初泛瀟湘

六槳齊飛急下灘碧琉璃上雪花翻越來溪色清如此  
只欠磯頭一釣竿

湘口夜泊南去零陵十里矣營水來自營道過零  
陵下湘水自桂林之海陽至此與營會合為一江

我從清湘發源來直送湘流入營水故人亭前合江處  
暮夜檣竿矗沙尾却從湘口望湘南城郭山川恍難紀  
萬壑千巖詩不徧惟有蒼苔痕屐齒三年瘴霧亦奇絕  
浮世登臨如此幾湖南山色夾江來無復瑤簪插天起  
坡陀狠石蹲清漲澹蕩光風浮白芷騷人魂散若為招  
傷心極目春千里我亦江南轉蓬客白鳥愁烟思故壘  
遠遊雖好不如歸一聲鷓鴣花如洗

南臺瑞應閣用壁間張安國韻

衝雨上山頭臨雲看山脚松間一彈指開此寶樓閣草  
鞵方費錢拂子不暇握小偈出雷音千古驚猿鶴

湘潭

暮雨檣竿縣一灣長官立馬水雲間風吹江沫浮浮去  
誰在沙頭閉戶閒

泊長沙楚秀亭

雨從湘西來波動南楚門不知春漲高但怪江水渾舟  
行風打頭陸行泥沒鞍且登裴公臺半日心眼寬

題嶽麓道鄉臺

山外江水黃江外滿城綠城外杳無際天低到平陸長  
烟貫楚尾遠勢帶吳蜀故園東北望遊子闌干曲

寄題潭帥王樞使佚老堂

孺子滄浪濯纓處千載新堂來卜鄰潦收無波徹底靜  
東湖之水堂中人濛陽花譜勝洛下竹西藥闌來海瀕  
新篁綠沈桂丹渥嶽立奇石蒼苔皴賞心滿眼伴閑戶  
天風夜下扶車輪胸中種蠶妙經濟鬢鬚白雪朱顏春

蒼生未佚身未老斯堂未可忘斯民四年西略可萬世  
孤撐獨立扛千鈞匹馬幡幡恃天日危言岌岌愁鬼神  
浮生早休信不惡持此欲去非吾聞客遊瀟湘逢騎吹  
知公已為蒼生起公今少勞佚者多湛輩乃可寒江蓑

王公自言堂去東湖頃步新得彭州牡丹揚  
州芍藥丹桂貓頭竹并徐氏五怪石列堂下

湘陰橋口市別游子明

馬首欲東舟欲西洞庭橋口暮寒時三年再別子輕去  
萬里獨行吾蚤衰遙憶美人湘水夢側身西望劍門詩

老來不灑離亭淚今日天涯老淚垂

竈渚

白魚出水卧銀刀紫筍堆盤脫錦袍  
捫腹將軍猶未快棹船西岸摘菱蒿

大波林

湖路荒寒又險艱大千空水我居間  
篙師晚始分南北指點青青漢口山

連日風作洞庭不可渡出赤沙湖



金沙堆前風未平赤沙湖邊波不驚客行但逐安穩去  
三十六灣漲痕生滄洲寒食春亦到荻芽深碧蘂芽青  
汨羅水飽動荆渚嶽麓雨來昏洞庭大荒無依飛鳥絕  
天地惟有孤舟行慷慨悲歌續楚些彷彿幽瑟迎湘靈  
黃昏慘淡樣極浦雖有漁舍無人聲冬湖落濡此暫住  
春潦怒長隨傭耕吾生一葉寄萬木況復搖落浮滄溟  
漁蠻尚自有常處羈官方汝尤飄零

寄題贛江亭

陳季陵贛州書云新作此亭  
泉使李正之題其榜要予詩

二水之會新作亭主人文章子墨卿我記斯亭且不朽  
千載當與文俱鳴題榜誰歟漢使者風流好事飾儒雅  
平生兩君吾故人安得繫馬亭堦下鼓旗西征上奔瀧  
所思不見心難降瞿塘縱有文鱗雙愛莫致之章貢江  
浯溪道中

江流去不定山石來無窮步步有勝處水清石玲瓏安  
得扁舟繫絕壁卧聽漁童吹短笛弄水看山到月明過  
盡行人不相識

夜泊灣舟大風雨未至衡州一百二十里

阿香攪客眠夜半驅疾雷空水受奇響如從船底來嘈  
嘈雨窓鬧軋軋風柁開睡魔走辟易耳界愁喧逐有頃  
飄驟過灘聲獨鳴哀燈婢燭囊衣篙師理檣桅煩擾到  
明發村雞亦喈喈

泊衡州

客裏仍哦對雨吟夜來星月曉還陰空江十日無春事  
船到衡陽柳色深

步入衡山

應有人家住隔溪綠陰亭午但聞雞松根當路龍筋瘦  
竹筍漫山鳳尾齊墨染深雲猶似瘴絲來小雨不成泥  
更無騎吹喧相逐散誕閒身信馬蹄

重遊南嶽

焚香鎮南殿過銓德觀醮注生祠庭觀  
道君王符王七及八角玉印經方四寸

許文曰注生真君玉印雨中登山遊南臺福嚴  
至瑞應擲鉢天柱諸峯之上寒甚病衰不至上  
封而返

捨舟得馬如馭氣步入青松三十里我從蠻嶺瘴烟來

不怕雨雲埋嶽趾憶昔南征款廟庭往來無恙神所祉  
當時已有歸田願帝臨此心如白水煌煌南正館於東  
手握八觚溫玉璽駿奔瀟霍左右輔好生不殺扶炎紀  
崇禋竣事曉壇空躋攀小試青鞋底不知雲磴幾千丈  
但見漫山白龍尾石頭招我上南臺瑞應闌干天半倚  
福嚴鐘聲過橋來彷彿三生如夢裏堂中尊者已先去  
苔鎖巖扉何日啟竹嫌磽确老逾瘦松畏高寒蟠不起  
癯儒尚病怕深登幽討未窮行且止我評七十二高峯

鬱律穹窿少觀美儼然可瞻不可玩往往雄爭如負屨  
乃知嶽鎮蓋深厚不與他山爭秀偉區區獻狀眩兒童  
乳洞淡巖真戲耳

四明人董嶧久居嶽市乞詩

祝融峯下兩逢春雨宿風餐老病身莫笑五湖萍梗客  
海邊亦有未歸人

三月十五日華容湖尾看月出

雲銷澧陽風月生岳陽水誰推赤金盤湧出白銀地徘

徊忽騰上蹠蹠恐顛墜稍高輪漸安飛彩到蓬背晶晶  
浪皆舞靨靨星欲避兜羅世界網普現無邊際官居東  
戶庭有眼如幻翳向非行大荒寧有此巨麗乘除較得  
失漂泊非左計妻孥競驩譁渠亦知許事

釣池口阻風迷失港道

回風打船失西東舵癡榜弱無適從三老號呼鐵纜墜  
招頭撾鼓驅魚龍千篙撐折百丈斷日暮稍與洪相通  
推移尋尺力千里時有黃帽來言功康莊大達世不乏

乃獨蹇產濤波中一官橫起險易相剎那憂喜隨兒童  
漲湖連天遠目斷且復加飯追萍蓬蒲團坐煖看香篆  
作止任滅如頑空

鼎河口枕上作

漂泊離巢燕彎跼負殼蝸瘦嫵莞席硬老覺畫屏奢報  
道帆當落傳呼鼓已撾且投人處宿未到已聞暮

安鄉縣西晚泊

水閣烏烏倦墟寒童僕飢一灣村縣過百折暮江遲曉



夢孤燈見春陰病骨知簡書寧不畏旅力奈先疲

澧陽江

順流下沅江溯流上澧浦水深蘭芷寒漂搖憚風雨  
采不盈掬何由寄遠渚洞庭浮天白遐矚莽吳楚有懷  
獨晤歎榜聲與人語暮夜即維舟蒼茫定何許

澧浦

葦岸齊齊似碧城江船罨岸逆風行綠蘋白芷俱憔悴  
惟有萋萋滿意生

澧江漁舍

安鄉澧陽之間自兵火後瘡殘猶未復

狡窟空來四十年沿江猶自少炊烟  
茫茫曠土無人問蘆荻春深綠滿川

孫黃渡

自此登陸至公安渡江過沙頭

捨舟從陸更間關徑仄仍荒亦未乾  
棘刺近人牢閉眼泥塗兀馬緊扶鞍  
茶山盜數路程惡麥壠人家懷抱寬  
擔僕輿夫盡劬瘁病翁那得更加餐

潺陵

舟橫攸河水馬滑潺陵道百里無鉏犁閒田生春草春  
草亦已瘦栖栖晚花少落日見行人愁烟沒孤鳥老翁  
雪髯鬢生長識羣盜歸來四十年墟里迹如掃莫訝土  
毛稀須知人力槁生聚何當復茲事恐終老人言古戰  
場瘡痍猝難療誰使至此極天乎吾請禱

將至公安

前村後村啼杜宇伴人憂煎與人語雲寒日薄春一夢  
地闊天低淚如雨我馬虺隤我僕痛豈不懷歸畏簡書

公安縣前酒可沽不如且聽提胡盧

公安渡江

食罷雨方作起行泥已深伴愁多楚些吟病獨吳音莫  
怨馬蹄滑須愁蠶事侵梅黃時節是未可決晴陰

荆渚堤上

原田何莓莓野水亂平楚大堤少人行誰與藝稷黍獨  
木且百歲骭髀立水許當年識兵燼見赦幾樵斧摩娑  
欲問訊恨汝不能語薄暮有底忙沙頭聽鳴榔

渚宮野步題芳草

草色沐新雨綠潤如得意披拂欲生烟  
冉冉著巾袂天涯各芳春秦吳千萬里  
故人攀桂枝今夕念遊子

發荊州

自此登舟至夷陵

初上蓬籠竹竿船始知身是劍南官  
沙頭沽酒市樓煖徑步買薪江墅寒  
自古秦吳稱絕國于今歸峽有名灘  
千山萬木垂垂老只欠天西蜀道難

虎牙灘

又名金門十二倍屬夷陵

傾崖溜雨色慘淡水墨畫辛夷碎花縣癭木老藤挂翠  
莽楚甸窮黃流蜀江下一灘今始嘗三峽此其亞雨點  
鼓士慘雲騰挽夫跨驚心度石林破眼見村舍牛眠草  
色裏犬吠竹林罅步頭可樣船安穩睡殘夜

峽州至喜亭

斷崖卧水口連岡抱城樓下有吳蜀客檣竿立滄洲雨  
後漲江急黃濁如潮溝時見出峽船鑼鼓噪中流適從  
稠灘來白狗連黃牛渦瀆大如屋九死爭船頭人鮓尚

脫免虎牙不須憂

初入峽山效孟東野

自此登陸至秭歸

峽山偪而峻峽泉湍以碻峽草如毳毛峽樹多樛枝峽禽惟杜鵑血吻日夜啼峽馬類黃狗不能長鳴嘶峽曉虎跡多峽暮人跡稀峽路如登天猿鶴不敢梯僕夫負碣哭我亦呻吟悲悲吟不成章聊賡峽哀詩

土門

汙泥汨峻阪狠石卧中路睥睨無敢前趑趄屢却顧長

繩引籃輿前輓後推去吏士更叫號作氣欲飛度顛墜  
較分寸商略跬步須臾氣亦竭一一汗如雨

桃花鋪

老巖漫山鳳尾張青楓直榦如攢槍山深嵐重鼻酸楚  
石惡淖深神慘傷陰崖風生吹客急草中枯株似人立  
眊眊卓幕先下程將士黃昏始相及

覆盆嶺

三登三降岡始斷一步一休日欲斜濁酒半瓶不得煖



覆盆有鋪無漿家

小望州

峰頭高絕鄰四瞰若窺井小山萬蟻垤大山拊其頂叢  
霄一握近罡風振衣冷似聞天人語笑我雪垂領曩侍  
玉案香委佩太清境獨下赤城戲俯仰一枰頃豈其厭  
晨華嗅此腥腐鼎揮手謝天人伶俜愧孤影來償繭足  
債尚欠界天嶺老矣且勸遊歸期行可請

大望州

望州山頭天四低東瞰夷陵西秣歸峽江微茫細如帶  
江外千峰青打圍黃牛廟磯石如劈想看驚湍虎鬚白  
水行陸走俱險艱安得如鳥有羽翼

一百八盤

疇昔辭桂林自謂已出嶺蛻蟬蠻烟中恍若醉夢醒今  
來峽山路步步躡雲頂仍聞蚯蚓瘴顧與嶠南等平生  
行路難驚浪兀漂梗迷塗茲益遠鳥道非人境老矣法  
當佚懷哉跡可屏拜手天東南亟上歸田請

火墨坡下嶺

清晨入岑蔚嵐重寒颼颼忽聞黃鸝語方悟麥始秋旅  
食法當瘦遠行人所愁況復深山中不與和氣游苦辛  
那敢憚病悴良可憂徒憂亦無益聊作商聲謳

八場平聞猿

清猿泠泠鳴玉簫三聲兩聲高樹梢子母聯拳傳枝去  
忽作哀厲長鳴號天寒林深山石惡行人舉頭雙淚閣  
雪澗琴心未足悲須寫峽中腸斷時

琴曲有雪  
澗聞猿

鑽天三里

非岡非嶺復非坡黃鵠不度吾經過妻孥下行啼且笑  
聯手相攜如踏歌風吹汗乾人力盡履齒與石方相磨  
鑽天三里似千里四十八盤將奈何

蛇倒退

山前壁如削山後崖復斷羣吾達隴首如海到彼岸那  
知下嶺處慄甚履冰戰牽前帶相挽縋後衣盡綻健倒  
輒尋丈徐行屢分寸上疑緣竹竿下劇滾金彈豈惟蛇

退舍飛鳥望崖反稍喜一徑平猶有千石亂仍逢新燒  
畬約略似耕畔心知人境近顰眉百憂散山民茹數把  
鬼質犢子健腰鑿走迎客再拜復三歎謂匪人所蹊官  
來定何幹儻為飢火驅平地豈無飯意者官事迫如馬  
就羈絆我乃不能答付以一笑粲

大丫隘

峽行五程無聚落馬頭今日逢耕鑿麥苗疎瘦豆苗稀  
椒葉尖新柘葉薄家家婦女布纏頭背負小兒領垂瘤

山深生理却不乏人有銀釵一雙插

石湖詩集卷十五

謹案卷十三第四頁後一行貝闕炯殘雪刊本貝

闕訛閤皂據宋詩改

第六頁後七行向來三尺泥刊本三下重衍三今

刪

第九頁前一行趁客賣魚雙槳急刊本槳訛槳據

宋詩改

卷十四第十二頁前五行自有音聞寶筏城刊本

寶訛室據宋詩改



卷十五第二十頁前八行健倒輒尋丈徐行厓分  
寸按宋詩鈔輒作轍厓作塵並與此異



總校官庶吉士臣侍朝

校對官編修臣閔惇大

謄錄監生臣宋維翰

謄錄舉人臣嚴儀

欽定四庫全書薈要

集部

石湖詩集卷十八

六至

詳校官助教臣謝登雋



石湖詩集卷十六

宋 范成大 撰

麻線堆

峽口驛前大山崛起舊路攀援而上縈紆如線十五年前浮圖德寶始沿澗伐木作

新路不復登山余觀峽路皆未嘗經修感德寶之事作麻線堆詩一首以風愛路使者及歸峽

二州長吏沈

業管熊四君

雲木盪胸起鬱莪一峯危上有路千折縷縷如縈絲是  
為麻線堆厥險天下稀偏仄容半足顛墜寧復稽騰猱

尚愁苦游子將安之浮屠德寶者悲智緒等慈隨山刊  
古木尋壑得長磯輿梁捷飛度布石綿階梯自從新路  
改重趼無齋咨縣有孫少府琬琰劉文詞勿云此事小  
惟有行人知況觀峽山路由來欠平治官吏既弗跡誰  
肯深長思天險固自若當令略成蹊土工運畚鍤石工  
操鑿椎烈火敗礲确築沙填隙巖多用百夫力遠無五  
旬期但冀米鹽給不須金幣支非客敢竊議道傍詢旄  
倪身雖雪山戍亦願助毫釐工費嗟小哉政須賢有司

東有管夷陵西有葉秭歸上維沈隱侯夔臺今吏師下  
維熊繹孫長材佐州麾豈吾金閨彥不如林下緇懸知  
議克合了此一段奇舟楫避潢潦置郵疾飛馳憧憧吳  
蜀客來往當無時仍磨鑱天石大書四賢詩不佞願秉  
筆遠寄峽口碑

戲書麻線堆下

一身半世走奔波疑是三生宿債多折券已饒麻線嶺  
責償難免竹竿坡

胡孫愁

傾崖當胸石齧足失勢毛羗檣幽谷王孫却走斷不到  
惟有哀猿如鬼哭僕夫酸嘶訴塗窮我亦付命無何中  
悲風忽來木葉戰落日虎嘯枯竹叢

判命坡

鑽天嶺上已飛魂判命坡前更駭聞側足三分垂壞磴  
舉頭一握到孤雲微生敢列千金子後福猶幾萬石君  
早晚北窗尋噩夢故應含笑老榆枌

千石嶺

晨光挂高嶺晴色媚遠客哀湍吼叢薄宿霧裊絕壁露  
重薊花紫風來蓬背白迷塗朴渥跳飲澗於菟跡層巔  
多折木迤磴有飛石不知山幾重杳杳入叢碧

九盤坡布水

莫惜縈迴上九盤洗心雙瀑雪花寒野翁酌水煎茶獻  
自古人來到此難

荒口



十步九喫蹶百夫半踰跚豁然鳥道窮努力造其巔謂  
是嶺頭了一峯復當前既無反顧法仰望心茫然

四十八盤

詰曲不前如宦拙欹傾當面似交難若將世路比山路  
世路更多千萬盤

紫荷車

峽山此  
藥甚多

綠英吐弱線翠葉抱修莖蟲如青旌節草中立亭亭根  
有却老藥鱗皺友松苓長生不暇學聊冀病身輕

錦帶花

東南甚珍此花  
峽中漫生山谷

妍紅棠棣粧弱綠薔薇枝小風一再來飄飄隨舞衣吳  
下嫵芳檻峽中滿荒陂佳人墮空谷皎皎白駒詩

入秣歸界

山根繫馬得漿家采入窮鄉事可嗟蚯蚓祟人能作瘡  
茱萸隨俗強煎茶幽禽不見但聞語野草無名都著花  
窈窕崎嶇殊未艾去程方始問三巴

早發周平驛過清烈祠下

屈平祠也祠  
前有獨醒亭

物色近人境，喜歡嚴曉裝。山月雞犬聲，野風麻麥香。登嶺既開豁，入林更清涼。三呼獨醒士，儻肯酌我觴。

白狗峽

陸路亦自峽上過  
西岸有玉虛洞

江紋圓復破，樹色昏還明。連灘竹節稠，洶怒奔夷陵。石磯鐵色頑，相望如姦朋。踞岸意不佳，當流勢尤獍。山回水若盡，但見青蛉峴。慘慘疑鬼寰，幽幽無人聲。顛沛安危機，艱難古今情。俯窺得目眩，却立恐神驚。白雲冒巖扉，下維玉虛庭。神仙坐閱世，應笑行人行。

秭歸縣

周封楚子熊繹於此縣宇宋玉宅東山清烈祠屈原宅也

永日貪程客長年弔古詩悲秋荒故宅負石慘空祠峻  
壁鴉翻倦高畬麥秀遲窮山熊繹國偏仄建邦時

歸州竹枝歌二首

東鄰男兒得湘纍西舍女兒生漢妃城郭如村莫相笑  
人家閶闔似渠稀

東岸艤船拋石門西山炊烟連白雲竹籬茅舍作晚市  
青蓋黃旗稱使君

昭君臺

在興山界中鄉人憐昭君築臺望之  
下有香溪然三峽女子十人九瘦

天生尤物元無種萬里巴村出青塚高臺望思臺已荒  
東風溪漲流水香嬋娟鍾美空萬古翻使鄉山多醜女  
灸眉作瘡亦不須人人有瘦如瓠壺

人鮓瓮

在歸州郭下長石截然據江三之二水盛  
時瀆渚極大號峽下最險處東岸即屈原

宅自此復登

舟至巫山

懷沙祠下鐵色磯中流東湍張禍機與齎俱入彼可弔  
乘流而行吾亦危江河難犯一至此天地好生安取斯

朝歌勝母古尚諱我其覆醢航秭歸

巴東峽口

水宿頻欹側徒行又險艱舟危神女峽馬瘦鬼門關  
照夜燒畬隴緣雲種竿山催成頭雪白休說鬢絲斑

初入巫峽

鑽火巴東岸撻金峽口船東江崖欲合漱石水多漩  
卓午三竿日中間一罇天偉哉神禹跡疏鑿此山川

將至巫山遇雨

數日快晴水落丈餘舟人方以為喜雨作即水又長矣

峽行水落惟憂雨通夕淋浪怨行旅千山萬山生白烟  
陽臺那得雲如許賤詞騰告翠帷僂句我一晴翻手間  
放開十二峯頭色重賦碧叢高插天

巫山高

并序

余舊嘗用韓無咎韻題陳季陵巫山圖攷宋玉賦意  
辨高唐之事甚詳今過陽臺之下復賦樂府一首世  
傳瑤姬為西王母女嘗佐禹治水廟中石刻在焉

濕雲不收烟雨霏峽船作灘梢廟磯杜鵑無聲猿叫斷

惟有飢鴉迎客飛西真功高佐禹跡斧鑿鱗皴倚天壁  
上有瑤簪十二尖下有黃湍三百尺蔓花蚪木風烟昏  
蘚珮翠帷香火寒靈旂飄忽定何許時有行人開廟門  
楚客詞章元是諷紛紛餘子空嘲弄玉色頽顏不可干  
人間錯說高唐夢

刺瀆淖

并序

瀆淖盤渦之大者峽江水壯則有之或大如一間屋  
相傳水行峽底遇暗石則瀆起已而下旋為渦然亦



未嘗有定處或無故突然而作叵測也舟行遇之小則欹傾大則與齎俱入險惡之名聞天下

峽江饒暗石水狀日千變不愁灘瀧來但畏漬淖見人言盤渦耳夷險顧有間仍於非時作未可一理貫安行方熨穀無事忽翻練突如湯鼎沸翕作茶磨旋勢迫中成窪怒霽外始暈已定稍安慰儵作更驚眩漂漂浮沫起疑有潛鯨嚙勃勃駭浪騰復恐蟄鼇扑篙師瞪禡魄灘戶呀雨汗逡巡怯大敵勇往決鏖戰幸免與齎入還

憂似蓬轉驚呼招竿折奔救竹竿斷九死船頭爭萬苦  
石上牽旁觀兢薄冰撇過捷飛電前余叱馭來山險固  
嘗徧今者擊楫誓豈復憚波面澎澎三峽長颺颺一葦  
亂既微掬指忙又匪科頭慢天子賜之履江神敢吾玩  
但催疊鼓轟往助雙槳健

嘲峽口

并序

峽山江濱亂石萬狀極其醜怪不可形容舉非世間  
諸所有石之比走筆戲題且以紀異

峽山狼無情其下多醜石頑質賈憎唾鬼狀發笑啞粗  
類墳壤黃沈漬鐵矢黑或如溝泥浣或似凍壁坼堆疑  
聚廩粟陟若壞城覓槎牙鏤朽木狼籍委枯骼礪砢包  
羸蚌淋漓錮鉛錫縱文瓦溝壟橫疊衣摺襞鱗皴斧鑿  
餘坎窞蹴踏力云何清淑氣孕此詭譎跡我本一丘壑  
嗜石舊成癖端溪紫琳腴洮河綠沈色階冊截肪膩泗  
磬鳴球擊嵌空太湖底偶立韶江側真陽剡千巖營道  
剜寸碧倦遊所閱多未易一二籍謁來茲山下刺眼昔

未覩或云峽多材奇秀鬱以積絕代昭君村驚世屈原  
宅東家兩兒女氣足豪萬國山石何重輕奚暇更融液  
我亦味其言作詩曉行客

勞畬耕

并序

畬田峽中刀耕火種之地也春初斫山衆木盡蹶至  
當種時伺有雨候則前一夕火之藉其灰以糞明日  
雨作乘熱土下種即苗盛倍收無雨反是山多磽确  
地力薄則一再斫燒始可藝春種麥豆作餅餌以度

夏秋則粟熟矣官輸甚微巫山民以收粟三百斛為  
率財用三四斛了二稅食三物以終年雖平生不識  
秔稻而未嘗苦飢余因記吳中號多嘉穀而公私之  
輸顧重田家得粒食者無幾峽農之不若也作詩以  
勞之

峽農生甚艱斫畬大山巔赤埴無土膏三刀財一田頗  
具穴居智占雨先燎原雨來亟下種不爾生不蕃麥穗  
黃剪剪豆苗綠芊芊餅餌了長夏更遲秋粟繁稅畝不

什一遺秉得饜餐何曾識杭稻捫腹嘗果然我知吳農  
事請為峽農言吳田黑壤腴吳米玉粒鮮長腰飽犀瘦  
齊頭珠顆圓紅蓮勝彫胡香子馥秋蘭或收虞舜餘或  
自占城傳早秈與晚秈濫吹甑甌間長腰米狹長亦名箭子齊頭白圓淨  
如珠紅蓮色微赤香子亦名九里香斗米入數合作飯  
芳香滿案舜玉稻焦頭無鬚俗傳替腹燒種以與之占  
城種來自海南秈秈秈秈  
最賤以上皆吳中米品也不辭春養禾但畏秋輸官

姦吏大雀鼠盜胥衆螟螣掠剝增釜區取盈折緡錢兩  
鍾致一斛未免催租癩重以私債迫逃屋無炊烟晶晶

雲子飯生世不下咽食者定游手種者長流涎不如峽  
農飽豆麥終殘年

巫山縣

自此復登陸至夔門縣前棹石灘最險登岸以過舟謂之盤灘城樓曰高唐門此去

瞿唐不百里縣人以郭西流石堆為水信流石沒則灩澦如馬矣

借馬巫山縣盤舟棹石灘梅肥朝雨細茶老暮烟寒門  
對高唐起江從灩澦難流堆三尺在旅夢一枝安

自巫山遵陸以避黑石諸灘大雨不可行泊驛中  
一日吏士自秭歸陸行者亦會

巫山信是陽雲臺客行五日雲不開陰晴何常有朝暮  
夜雨少休明復來今朝水長不知數沒盡山根蒼石堆  
東磯西磯盡如削大灘小灘俱若雷不知瞿唐復何似  
想見萬頃淙一杯祇今水齧已壯矣聞道陸程尤艱哉  
摩圍隘口石生角跼蹐坡前泥似醅眼前安得故園路  
江沙江草便青鞋

燕子坡

大山如牆缺小山如塚累衆山直下看方知此峯危木



末見夔峽一溝壑春泥中有天下險造化真兒嬉峯頂  
不滿笑舟中鬢成絲登高尚超覽況乃絕俗姿

鬼門關

天作隴頭石闕人言要隔塵樊百年會須作鬼無事先  
穿鬼關

離巫山好晴午後入瞿唐關憩高齋半日

一昨題詩訴苦霖果然連夜卷曾陰盡收行雨瑤姬賜  
不徇世情巫峽心喜鵲滿枝朝日淡哀猿何處宿雲深

水門山徑高齋外一枕清風屏萬金

高齋即杜詩所謂  
瞿色延山徑高齋

次水  
門者

灩澦堆

灩澦之石誰剗鑄惡駭天下形眇然客行五月潦始漲  
但見匹馬浮黃湍時時吐沫作瀆淖潏潏有聲如粥煎  
蜀江西來已無路鑿山作澮方成川瞿唐之口狹如帶  
乃欲納此江漫漫奔流下赴故偏仄汝更爭道當其前  
舟師歆傾落膽過石孽水禍吁難全山川丘陵皆地險

惟此險絕餘難肩東坡筆端喙三尺願與作賦評嘲喧  
云非此石峽更怒白頭忽作傾城妍我從巫山飛一棹  
歡喜偶脫蛟龍涎是非信否未暇詰且上高齋清晝眠  
夔州竹枝歌九首

五月五日嵐氣開南門競船爭看來雲安酒濃麴米賤  
家家扶得醉人迴

赤甲白鹽碧叢叢半山人家草木風榴花滿山紅似火  
荔子天涼未肯紅

新城果園連瀼西枇杷壓枝杏子肥半青半黃朝出賣  
日午買鹽沽酒歸

癯婦赴墟城裏來十五五市南街行人莫笑女癯醜  
兒郎自與買銀釵

白頭老媪簪紅花黑頭女娘三髻丫背上兒眠上山去  
採桑已閑當採茶

百衲畬山青間紅粟莖成穗豆成叢東屯平田秔米軟  
不到貧人飯甑中

白帝廟前無舊城  
荒山野草古今情  
只餘峽口一堆石  
恰似人心未肯平

灩澦如撲瞿唐深  
魚復陣圖江水心  
大昌鹽船出巫峽  
十日溯流無信音

當筵女兒歌竹枝  
一聲三疊客忘歸  
萬里橋邊有船到  
繡羅衣服生光輝

雲安縣

春暮子規少日斜  
紅鵲飛兩山多布水  
一島幾柴扉  
蚓

吐無窮壤人行不斷磯巴陽昨夜雨灘上水先肥

杜子美詩

云涪萬無杜鵑雲安詩云終日子規啼今萬州界固不聞杜鵑而雲安已自少矣紅鵲飛時滿背純赤或云即黃鶴也峽中蚯蚓之盛無如雲安江濱墳壤戰戰無際又多大小石岸有一石長里許者杜子美詩云禹功多斷石其實甚長兩山間雨後瀑泉數十百處尤可觀

萬州

自此後登陸州號南浦郡

晨炊維下巖晚酌樣南浦波心照州榜雲脚響衙鼓前

山如屏牆得得正當戶西江朝宗來循屏復東去

此萬州形

勢也惟親歷者當知此言之工

官曹倚巖樓市井喚船渡瓦屋仄石磴

猿啼鬧人語別核杏餘酸連枝茶刺苦窮鄉固瘠薄陋

俗亦寒窶

土人賣杏皆先剔其核取仁以為藥也土茶甚苦不簡枝葉雜茱萸煎之

營營謀

食艱寂寂懷甄訴昔聞吏隱名今識吏隱處

橫溪驛感懷

行徧天涯與地隅筋骸那比十年初朱顏有酒且留住  
白髮無方能掃除未得歸田先作賦專攻種樹已成書  
祇今飛到南山下猶解清晨出荷鋤

午夜登嶠山

瘴暑嚴夜裝乘涼躡危嶠猿依黑林號鬼閃青炬嘯驚  
鳥動危葉吟蟲滿荒草泉聲遠相隨山色近如香夢猶  
風燈前身已雲木杪浮生固有役遠道何時了豈惟失  
寢興亦自倒昏曉恭惟天心仁頗議民力槁我懷漢制  
詔來慰蜀父老熙如春臺登沃若時雨膏須知簡書急  
勿厭蓐食早但勤筆力淬時助詩腸攪

峽石鋪

由萬州至此山頂皆有長石如城壁亘數  
峯不斷峽山至是亦稍開廣間有稻田

峯頭壁立偉天造萬雉石城如帶繞山骨鱗皴火種難



山下流泉却宜稻新秧一稜綠茸茸茅花先秋雪搖風  
后皇嘉種不易熟野草何為撓歲功

蟠龍嶺

自峽歸夔萬至於梁山五郡間不知其幾  
嶺梁山之蟠龍峯門尤為高峻然下嶺即

有平陸吏卒  
皆相賀云

夷陵至胸臆複嶺苦絲亂初程尚勇往少日還委頓安  
得長劒揮盡剷疊嶂斷雖云北山愚聊快南溟運此意  
竟蕭索勞歌謾淒曼日日望平陸念念到彼岸人言東  
馬險但欠蟠龍峻摧頽强弩末龜勉焚舟戰譬如已償

逋猶有未折券山根治曉裝峯頂寄朝飯稍脫虻瘴染  
還探虎窠翫性命乃可憂筋力何足算

嶺半途有餓頭山以形得名其

上多驚獸土人謂之虎窠

蟠龍瀑布自山頂漫汗淋漓分數道而下望之宛  
從天降當為城中布水第一

銀漢來從左界天天風吹浪落蒼巔人間只見秧田潤  
喚作蟠龍洞裏泉

峯門嶺遇雨泊梁山

窮鄉誰與話悲酸  
駐馬看雲強自寬  
酒力無端妨宿病  
詩情不淺任塵官  
虎狼地僻炊烟晚  
風雨天低夏木寒  
行盡峯門千萬丈  
梁山鼓角報平安

邗邳驛大雨

暮雨連朝雨長亭又短亭  
今朝騎馬怯平日繫船聽竹  
葉垂頭碧秧苗滿意青  
農疇方可望客路敢遑寧

墊江縣

屬忠州

青泥沒髀僕頻驚  
黃漲平橋馬不行  
舊雨雲招新雨至

高田水入下田鳴百年心事終懷土一日身謀且望晴  
休入忠州爭米市暝鴉同宿墊江城

巾子山又雨

百日籃輿困跼踰三晨泥坂兀躋攀晚晴幸自墊江縣  
今雨奈何巾子山樹色於人殊漠漠雲容憐我稍班班  
如今只憶雪溪句乘興而來興盡還

鄰山縣

山頂噓雲黑似烟脩篁高柳共昏然鳥啼一夜勸歸去

誰道東川無杜鵑

沒冰鋪晚晴月出曉復大雨上漏下濕不堪其憂

晚色熏微煖似薰兒童歡喜走相聞無端星月照濕土

依舊山川生雨雲

吳諺曰星月照濕土明朝依舊雨蓋雨後微晴星月燦然必復雨占之每

驗旅枕夢寒泠屋漏征衫潮潤冷爐熏快晴信是行人

願又恐田家曝背耘

金山嶺

阪峻身頻偃崖深首屢回雲浮平地出路拂半天來但

閱關山過都忘歲月催湘南初上馬猶插早春梅

金山嶺險

峻多  
古梅

明日至鄰水又雨

昨日方無雨今朝又不晴滿山皆屐齒隨處有泉聲頗  
怪陰霖積應催老病成泥塗千騎士與我共勞生

殘夜至峯頂上

片月挂高嶺我行至其巔舉手欲攬擷恐驚乘鸞仙  
菲桂香動肅肅露脚寒北斗已到地南斗猶闌干但聞

浮黎音來從始青天大星與之俱曉色明旗旛素烟渺  
陸海中有人所寰想見地上友啟明膏火煎星落玉宇  
白日生綺霞丹冰輪未肯去相看尚團團

望鄉臺

千山已盡一峯孤立馬行人莫疾驅從此蜀川平似掌  
更無高處望東吳

蚤晴發廣安軍晚宿萍池村莊

夜雨洗煩蒸曉風薦清穆雲頭隕鐵山日脚迸金瀑暑

塗一日涼遠客萬事足羈人正奔波觀者何陸續翠蓋  
立嚴粧青裋行跣足俗陋介南徼物華入東蜀竹萌苦  
已青荔子酸猶綠脩蘆密成籬直柏森似纛泥乾馬蹄  
鬆路坦亭堠速暮投何人莊窻戶暗脩竹

巴蜀人好食生蒜臭不可近頃在嶠南其人好食  
檳榔合蠅灰扶留藤一名萋藤食之輒昏然已而  
醒快三物合和唾如膿血可厭今來蜀道又為食  
蒜者所熏戲題



旅食諳殊俗堆盤駭異聞  
南餐灰薦蠅巴饌菜先葷  
幸脫蔓藤醉還遭胡蒜熏  
絲蓴鄉味好歸夢水連雲

嘉陵江過合州漢初縣下

井徑東川縣山河古合州  
木根擎斷岸急雨沸中流  
關下嘉陵水沙頭杜老舟  
江花應好在無計會江樓

新晴行郵水上與涪江相近

塗泥初乾雨不落日色未出暑光薄  
畏途得晴天復涼  
真是腰錢更騎鶴  
渾渾郵水流未平悄悄涪江如鏡清

過盡江沙穿麥隴忽有青蜩扶葉鳴

小溪縣

屬遂寧

刈麥千平隴橫槎一小溪梓花紅綻碎粟穗綠垂低村  
婦猶多跣山猿遂少啼東川雖已過錦里尚雲西

茸山道中感懷

侍臣筆橐舊西班牙大將麾幢又百蠻挂席南箕宿昔事  
閃旗東井何時還日增衰病復一日山隔舊遊知幾山  
倦拂盤陀蒼石坐歸心聊與石俱頑

曉發飛鳥晨霞滿天少頃大雨吳諺云朝霞不出  
門暮霞行千里驗之信然戲紀其事

朝霞不出門暮霞行千里今晨日未出曉氣散如綺心  
疑雨再作眼轉雲四起我豈知天道吳農諺云爾古來  
占滂沱說者類恢詭飛雲走羣羊停雲浴三豸月當天  
畢宿風自少女起爛石燒成香汗礎潤如洗逐婦鳩能  
拙穴居狸有智蜉蝣強知時蜥蜴與聞計蛭鳴東山鶴  
堂審南柯蟻或加陰石鞭或議陽門閉或云逢庚變或

自換甲始刑鵞與象龍聚訟非一理不如老農諺響應  
捷如鬼哦詩敢夸博聊用醒午睡

遂寧府始見平川喜成短歌

峽之西遂之東更無平地二千里惟有高山三萬重不  
知誰人鑿混沌獨此融結何其工我本江吳弄水月忽  
來踏徧西南峯不知塵界在何許但怪星辰浮半空直  
疑飛入蝶夢境此豈應有人行蹤今朝平遠見城郭云  
是東川軍府雄原田坦若看掌上沙路淨如行鏡中芋

區粟壠潤含雨楮林竹徑涼生風將士懽呼馬蹄快康  
莊直與錦里通半年崎嶇得夷路一笑未暇憐飄蓬

石湖詩集卷十六

石湖詩集卷十七

宋 范成大 撰

九月十九日衙散回留大將及幕屬飲清心堂觀

晚菊分韻得譟暮字

暮字作  
樂府

甲光射曾雲雨腳不敢到西山明古雪秋日一竿照先  
偏井絡密後拒參旗掉分弓滴博平鳴劒伊吾小君看  
天山箭狐兔何足了開邊吾豈敢自治有餘巧歸來翠

帷卷聊共黃花笑雖無落帽風亦復接羅倒餘閒校筆  
陣刻燭龍蛇掃毛錐乃更勇我亦鼓旗譟

冬至日銅壺閣落成

走徧人間行路難異鄉風物雜悲歡三年北戶梅邊暖  
萬里西樓雪外寒已辦鬢霜供歲籥仍拚髀肉了征鞍  
故園雲物知何似試上東樓直北看

十二月十八日海雲賞山茶

追趁新晴管物華馬蹄鬆快帽檐斜天南臘盡風啼雪

冰下春來水漱沙已報主林催市柳仍從掌故問山茶  
豐年自是謹聲沸更著牙前畫鼓撾

雨後東閣排岸司申梅開方及三分戲書小絕令  
一面開燕

雨入南枝玉蘂皴合江雲冷凍芳塵司花好事相邀勒  
不著笙歌不肯春

鞭春微雨

旛勝絲絲雨笙歌步步塵一年新樂事萬里未歸人雲



薄竟慳雪酒濃先受春  
送寒東作近慚愧耦耕身

綠萼梅

朝罷東皇放玉鸞  
霜羅薄袖綠裙單  
貪看修竹忘歸路  
不管人間日暮寒

玉茗花

折得瑤華付與誰  
人間鉛粉弄粧遲  
直須遠寄鸞客  
鬢腳飄飄可一枝

張正字母夫人朱氏挽詞

蘋藻儀邦媛詩書了歲華  
簾金寧遺子羣玉竟傳家  
厚施心無數浮生自有涯  
空餘報恩子三載亦苴麻

十二月二十四日西樓觀雪

一夜珠簾不下鉤  
徹明隨雪上西樓  
瑤池萬頃崑崙近  
玉壘千峯滴博收  
已報春迴南畝潤  
從教寒勒北枝愁  
四筵都為豐年醉  
錄事何須校酒籌

丙申元日安福寺禮塔

成都一歲故事始於此士女大集拜塔下然香挂旛

以禳兵火之災

嶺梅蜀柳笑人忙歲歲椒盤各異方耳畔逢人無魯語

蜀人鄉音極難解其為京洛音輒謂之虜語或是僭偽時以中國自居循習至今不改也既又諱之改作魯語

尤可笑姑鬢邊隨我是吳霜新年後飲屠蘇酒故事先

就用其字然窄堵香石筍新街好行樂與民同處且逢場余新甃石筍街

初三日出東郊碑樓院故事祭東君因宴此院蜀人皆以是日拜掃

遠柳新晴暝紫煙小江吹凍舞清漣紅塵一闋人歸後

點點飢鳶蹙紙錢

郊外閱驍騎剪柳亦曰樣柳

千騎同瞻白羽揮驚塵一開響金鞵不知掣電彎弓過  
但覺柳梢隨箭飛

初四日東郊觀麥苗

去歲秋霖麥下遲臘殘一雪潤無泥相將飽喫滹沱飯  
來聽林間快活啼

櫻桃花

借煖衝寒不用媒勻朱勻粉最先來玉梅一見憐癡小  
教向傍邊自在開

再出東郊

晚景增年慣官身作客諳大都緣偶熟豈是性能堪昔  
者開三徑他時老一龕越溪親種竹芸綠想毵毵

三月二日北門馬上

新街如拭過鳴騶芍藥酴醾競滿頭十里珠簾都捲上  
少城風物似揚州

上巳前一日學射山萬歲池故事

北郊征路記前回三尺驚塵馬踏開新漲忽明多病眼

好風如把及時杯青黃麥隴平平去疎密棹林整整來  
游騎不知多幾許長隄十里轉輕雷

上巳日萬歲池上呈程詠之提刑

濃春酒煖絳煙霏漲水天平雪浪遲綠岸翻鷗如北渚  
紅塵躍馬似西池麥苗剪剪嘗新麪梅子雙雙帶折枝  
試比長安水邊景祇無飢客為題詩

新作景亭程詠之提刑賦詩次其韻二首

飛鴻銜子謾紛紛萬里西遊始識真不管吳霜微點鬢

來看蜀錦爛爭春倚闌定有司花女秉燭仍留主夜神  
異縣賞心誰與共故人新作坐中賓

小築聊鋤草棘荒遊人錯比召南棠花邊霧鬢風鬟滿  
酒畔雲衣月扇香燦爛吟牋煩索句淋漓醉墨自成行  
報章遲鈍吾衰矣終日冥搜謾七襄

錦亭然燭觀海棠

銀燭光中萬綺霞醉紅堆上缺蟾斜從今勝絕西園夜  
壓盡錦官城裏花

寶相花

誰把柔條夾砌栽，壓枝萬朵一時開。  
為君也著詩收拾，題作西樓錦被堆。

三月二十三日海雲摸石

勸耕亭上往來頻，四海萍浮老病身。  
亂插山茶猶昨夢，重尋池石已殘春。  
驚心歲月東流水，過眼人情一闕塵。  
賴有貽牟堪飽飯，道逢田畯且眉伸。

四月十日出郊



約束南風徹曉忙收雲捲雨一川涼漲江混混無聲綠  
熟麥騷騷有意黃吏卒遠時閒信馬田園佳處忽思鄉  
鄰翁萬里應相念春晚不歸同插秧

納涼

雨洗新秋夜氣清悴肌無汗葛衣輕畫檐分月下西壁  
絡緯飛來庭樹鳴

西樓獨上

竹日駐微暑松風生早秋閒尋來處路獨倚靜中樓老

景驅雙轂鄉心挽萬牛相隨木上坐腳底亦雲浮

曉詣三井觀

路轉市聲遠寬閒古城東適從紅塵來忽入蒼烟叢  
心傾濃露芋葉翻微風秋陽澹籬落殘暑不必攻  
野老熟睡起日高首如蓬官身騎官馬君應笑龍鍾

曉起

黠鼠緣鈴索飢鳥啄井欄不眠秋漏近多病曉屏寒  
咄渠何怪休休我自闌牙門朝日上簫鼓報平安

舫齋晚憩

心作萬緣起境生千劫忙誰同油幕靜獨對篆煙長有  
盡天魔力無窮海印光雨餘弦月上塵界本清涼

秋雨快晴靜勝堂席上

一笑憧憧鴈驚行簿書堆裏賦秋陽心如墜絮沾泥懶  
身似飛泉激石忙雨後蹲鴟先稻熟霜前浮蟻鬪棖香  
天涯節物遮愁眼且復隨鄉便入鄉

新涼夜坐

吏退焚香百慮空靜聞蟲響度簾櫳江頭一尺稻花雨  
窗外三更蕉葉風日日老添明鏡裏家家涼入短檠中  
簡編燈火平生事雪白眇昏奈此翁

秋老四境雨已沛然晚坐籌邊樓方議祈晴樓下  
忽有東界農民數十人訴山田却要雨須長吏致  
禱感之作詩

歲晚羈懷有所思秋來病骨最先知鏡中公案已甘老  
紙上課程休諱癡西堰頗聞江漲急東山猶說雨來遲

錦城樂事知多少憂旱憂霖感盡眉

西樓夜坐

抗塵懷抱若為寬繞屋蛙聲亦在官巖桂無香秋遂晚  
江鱸有約歲將寒文書散亂嘲癡絕燈火淒清語夜闌  
病倦百骸非復我但思禪板與蒲團

立秋月夜

已放新涼入簟紋更驅餘溽避爐薰穿雲竹月時時見  
咽露莎蟲院院聞稍喜雪山無斤堠但虞煙驛有移文

行藏且付蘧蘧夢明發還親鴈鷺羣

前堂觀月

箕踞繩牀政自豪遠遊何暇續離騷蕭森萬竹秋逾瘦  
突兀雙楠夜更高東郭風喧三鼓市西城石洶二江濤  
色塵聲界如如現本自無禪不用逃

有懷石湖舊隱

浩蕩沙鷗久倦飛摧頽櫪馬不勝鞿官中風月常虛度  
夢裏關山或暫歸橘社十年霜欲飽鱸江一雨水應肥

冷雲著地塘蒲晚誰為披蓑煖釣磯

太平瑞聖花

雪外捫參嶺烟中濯錦洲密攢文杏葉高結綵雲毬百  
世嘉名重三登瑞氣浮挽春同住夏看到火西流

無題

聞道明朝送舊官無情更鼓夜將闌此生見面知何日  
忍淚須臾子細看

晁子西寄詩謝酒自言其家數有逝者詞意悲甚

次韻解之且以建茶同往

我讀鬼子詩十語九慨傷長川日夜逝鬢髮空蒼浪君  
家出世學無生亦無亡鄉謂法幢立何乃槁木僵起滅  
不滿笑古來共楸行豈其捏目華解翳海印光我酒愧  
薄薄未能煖愁腸申以春風芽一淪萬慮忘慧刀儻未  
割會且掀禪牀錦里有逢迎謹避舍蓋堂居然足音跂  
好在故意長啜耳念一洗遲君鳳鳴岡

早衰不寐



官事拘攣似力田作勞歸晚意茫然按摩合體俱非我  
展轉通宵似遠年一叟披衣惟兀坐羣兒得枕便佳眠  
人生元是華胥客休向迷塗更著鞭

晚步宣華舊苑

喬木如山廢苑西古溝疎水靜鳴池吏兵窸窣番更後  
樓閣崔嵬欲暝時有露冷螢猶照草無風驚雀自遷枝  
歸來更了程書債目眊昏花燭穗垂

西樓秋晚

樓前處處長秋苔  
俛仰璿杓又欲回  
殘暑已隨梁燕去  
小春應為海棠來  
客愁天遠詩無托  
吏案山橫睡有媒  
晴日滿窗鳬鶩散  
已童來按鴨爐灰

明日分弓亭按閱再用西樓韻

眼看白露點蒼苔  
歲月飛流首屢回  
老去讀書隨忘却  
醉中得句若飛來  
聞雞午夜猶能舞  
射雉西郊不用媒  
自笑支離聊復爾  
丹心元未十分灰

丁酉重九藥市呈坐客

余於南北西三方皆走萬里皆遇重九每作水調一

關燕山首句云萬里漢家使桂林云萬里漢都  
護成都云萬里橋邊客今歲倦遊甚矣不復更  
和前曲乃作  
此詩以自戲

莫向登臨怨落暉  
自緣羈宦阻歸期  
年來怨把三邊酒  
此去休哦萬里詩  
烏帽不辭歌短髮  
黃花終是欠東籬  
若無合坐揮毫健  
誰解西風楚客悲

會慶節大慈寺茶酒

霜暉催曉五雲鮮  
萬國歡呼共一天  
澹澹煖紅旗轉日  
浮浮寒碧瓦收煙  
銜杯樂聖千秋節  
擊鼓迎冬大有年

忽憶捧觴供玉座不知身在雪山邊

冬至日天慶觀朝拜雲日晴麗遙想郊裡慶成作

驩喜口號

浙浙霜風不滿旗紫烟黃氣捧朝曦五更貫索埋光後  
萬里鉤陳放仗時留滯周南無舊事布宣漢德有新詩  
豐年四海皆溫飽願把歡心壽玉卮

十一月十日海雲賞山茶

門巷歡呼十里村臘前風物已知春兩年池上經行處

萬里天邊未去人客鬢花身俱歲晚粧光酒色且時新  
海雲橋下溪如鏡休把冠巾照路塵

海雲回按驍騎於城北原時有吐番出沒大渡河  
上

古道風沙捲夕霏小江煙浪皺春漪天於麥隴猶慳雪  
人向梅梢大欠詩頓轡青驪飛脫兔離弦白羽嘯寒鴟  
牙門列校俱剽銳檄與河邊禿髮知

合江亭隔江望瑤林莊梅盛開過江訪之馬上哦

此

何處春能早疎籬限激湍竹間煙雪迴馬上晚香寒喚  
渡聊相覓巡檐得細看極知微雨意未許日烘殘

新作官梅莊移植大梅數十本繞之

臘前催喚主林神玉樹飛來不動塵契濶西湖慚處士  
飄零東閣似詩人一天午夢空花碎滿地春愁月影新  
掃淨宣華藜藿逕他年誰記石湖濱

丁酉正月二日東郊故事

椒盤宿酒未全醒擾擾金鞍逐畫駟麥雨一犁隨處綠  
柳烟千縷幾時青客愁舊歲連新歲歸路長亭間短亭  
萬里松楸雙淚墮風前安得諱飄零

二月二十七日病後始能扶頭

複幕重簾苦見遮暮占栖雀曉占鴉殘燈煮藥看成老  
細雨鳴鳩過盡花心為蚤衰元自化髮從無病已先華  
更蒙厲鬼相提唱此去山林屬當家

病中聞西園新花已茂及竹筵皆成而海棠亦未過

梅塢桃蹊斫竹初三旬高卧信音疎春雖與病無交涉  
雨莫將花便破除祇合蘧蘧隨夢去何須咄咄向空書  
頗聞蜀錦猶相待去歲今朝已雪如

枕上

一枕經春似宿醒三衾投曉尚淒清殘更未盡鴉先起  
虛幌無聲鼠自驚久病厭聞銅鼎沸不眠惟望紙窗明  
推頽豈是功名具燒藥爐邊過此生

初履地



扶頭今日強冠簪餘燼收從百戰酣長脰閣軀如瘦鶴  
衝風奪氣似枯枿客來慵攬懶殘涕老去定同彌勒龕  
何處更能容結習任教花雨落毵毵

密室憊坐

如許頭顱莫振矜但尋曲几與枯藤餘生不直一彈指  
此病寧論三折肱何處丹房癡候火誰家籌室強傳燈  
本來識字耕夫耳今歲仍添百不能

春晚初出西樓

試倚枯藤似籊雲堂階微步小逡巡忽逢巖桂新抽葉  
屈指黃紬睡一春

春晚卧病故事都廢聞西門種柳已成而燕宮海棠亦爛漫矣

軒窗深窈似禪房竟日虛明裊斷香詩債無邊春已老  
睡魔有約晝初長市橋烟雨應官柳墟苑池臺自海棠  
游騎行歌莫相笑遨頭六結已龜藏

病起初見賓僚時上疏勾祠未報

浪將冠服衣猿狙因病偷閒稍自如時有好懷誇得句  
畧無情語怕回書邊城晏閉稀傳箭村巷春遊未荷鋤  
迨此良辰公事少天恩儻許賦歸歟

陸務觀云春初多雨近方晴碧雞坊海棠全未及  
去年

遲日溫風護海棠十分顏色醉春粧天公已許晴教好  
說與鳴鳩一任忙

報事碧雞坊裏來今年花少似前回笙簧冷落遨頭病

不著梁州打不開

清明日試新火作牡丹會

蜀人以洛中千葉種為京花單葉為州花

再鑽巴火尚浮家去國年多客路賒  
那得青煙穿御柳且將銀燭照京花  
香鬟半醉斜枝重病眼全昏瘴霧遮  
錦地繡天春不散任教檐雨捲泥沙

三月十九日夜極冷

誰勒餘寒不放回春深猶煖地爐灰  
鄉心忽向燈前動夜雨先從竹裏來  
鴟鴞已如鶯百轉醅醪那復雪千堆

調糜煮藥東風老慚愧茶甌與酒杯

垂絲海棠

春工葉葉與絲絲怕日嫌風不自持  
曉鏡為誰粧未辨沁痕猶有淚胭脂

浣花戲題爭標者

凌波一劇便捐生得失何曾較重輕  
蝸角虛名人尚愛錦標安得笑渠爭

鹿鳴宴

岷峨鍾秀蜀多珍坐上儒生更逸羣墨沼不憂經覆瓿  
琴臺重有賦凌雲文章小技聊干祿道學初心擬致君  
富貴功名今發軔願看稽古策高勲

陸務觀作春愁曲悲甚作詩反之

東風本是繁華主天地元無著愁處詩人多事惹閒情  
閒門自造愁如許病翁老矣癡復頑風前一笑春無邊  
糟牀夜鳴如落泉一杯正與人相關

種竹了題愛山亭

灑掃宣華舍此君煙中月下綠生塵他年葉葉清風滿  
莫忘今年借宅人

題錦亭

手開花徑錦成窠浩蕩春風載酒過來歲遊人應解笑  
甘棠終少海棠多

石湖詩集卷十七